

आकाशवाणी

खास-खास खबरां:-

1. प्रधानमंत्री नरेन्द्र मोदी होर अज्ज नमीं दिल्ली च वियतनाम दे राष्ट्रपति तो लाम हुंदे कन्नै गल्लबात करंडन।
2. चुना आयोग नै चुनां प्रक्रिया मुकम्मल होने दे चलदे नमी विधानसभा दे गठन लेई अधिसूचना जारी कीती।
3. एन.आई.ए नै इक डाक्टर ते 2 होरनें खिलाफ ISIS कन्नै सरबन्धत होने ते जैविक हमले दी साजिश रचने दे आरोपे दे चलदे अदालतै च इन्दे खिलाफ चार्जशीट दाखल कीती।
4. अमरीकी राष्ट्रपति होरे होर्मुज जल डमरु मध्य च फसे दे ज्हाजे गी सुरक्षित कड्डने सरबन्धी प्रोजेक्ट “फ्रीडम” गी फिलहाल रोकने दी घोषणा कीती ऐ।
5. ते आई.पी.एल क्रिकेट च कल रातीं खेड्डे गेदे इक मुकाबले च चेन्नेई सुपर किंग्स नै दिल्ली कैपिटल्स गी 8 विकट कन्नै हराया।

<><><><><><>

PM -Talk

प्रधानमंत्री नरेन्द्र मोदी होर अज्ज नमीं दिल्ली च वियतनाम दे राष्ट्रपति तो लाम हुंदे कन्नै नमीं दिल्ली च गल्लबात करंडन । दवै नेता दपक्खी सरबन्धे दे बक्ख-बक्ख पैहलुएं कन्नै आपसी हित ते क्षेत्रीय ते वैश्विक मुद्दे पर व्यापक चर्चा करंडन। वियतनाम दे राष्ट्रपति कल त्रै-दिन दी भारत यात्रा पर नमीं दिल्ली पुज्जे। हवाई अड्डे पर गृह राज्यमंत्री नित्यानंद राय होरे उन्दा सोआगत कीता। उन्दे कन्नै वियतनाम सरकार दे केई मंत्रिं ते वरिष्ठ अधिकारिं दा इक उच्च स्तरीय प्रतिनिधिमंडल बी ऐ। इस बरे अप्रैल च वियतनाम दे राष्ट्रपति चुने जाने दे मगरा राष्ट्रपति तो लाम हुंदी एह भारत दी पैहली राजकीय यात्रा ऐ।

<><><><><><>

Assembly Election

चुनां आयोग नै पच्छिम बंगाल- असम- केरल- तमिलनाडू ते पुदुचेरी च चुनां प्रक्रिया मुकम्मल होने मगरा नमीं विधानसभा दे गठन लेई अधिसूचना जारी कीती। एह अधिसूचना राज्ये ते केन्द्र शासित प्रदेशों दे राज्यपालें ते उपराज्यपालें गी भेजी गई ऐ।

<><><><><><>

EC/WB- New Assembly

चुनां आयोग नै पच्छम बंगाल च चुनां प्रक्रिया पूरी होने मगरा नमीं विधानसभा दे गठन लेई अधिसूचना जारी कीती ऐ। एह अधिसूचना पच्छम बंगाल दे गवर्नर होरें गी भेजी गई ऐ जेदे कन्नै औपचारिक तौर पर चुनां प्रक्रिया मुकम्मल होई गई ते प्रदेश च नमीं सरकार कायम करने लेई मंच तयार होग। निर्वाचन आयोग दे अधिकारी नै आखेआ जे अधिसूचना जारी करना- नतीजे दी घोषणा मगरा- इक महत्वै आहली गैऽ ऐ। नमीं सरकार कायम करने च एह महत्वै आहली प्रक्रिया ऐ।

<><><><><><>

Trump Congratulates

अमरीका दे राष्ट्रपति डोनाल्ड ट्रम्प होरें पच्छम बंगाल च भारतीय जनता पार्टी दी ऐतिहासिक जित पर प्रधानमंत्री नरेन्द्र मोदी होरें गी बधाई दिती ऐ। व्हाइट हाउस दे प्रवक्ता कुश देसाई नै दस्सेआ जे पिछले महीने गै फोन पर होई दी गल्लबात च राष्ट्रपति ट्रम्प होरें प्रधानमंत्री मोदी हुंदी सराहना कीती ही ते आखेआ जे भारत बड़ा गै खुशकिस्मत ऐ कि जे उसी मोदी हुंदे आहला लेखा नेता थोआ ऐ। पच्छम बंगाल च भाजपा दी जित दे कन्नै ममता बैनर्जी दी अगुआई आहली तृणमूल कांग्रेस दा 15 बरे दा शासन खत्म होई गेआ।

<><><><><><>

Mamta Allegations

चुना आयोग नै त्रिणमूल कांग्रेस पार्टी ते पच्छम बंगाल दिएं मुखमंत्री हुंदे आसेआ लाए गेदे उ'नें सारें आपोरें गी सिरे थमां खारज करी दिता ऐ- जिंदे च उ'नें आखेआ हा कि भवानीपुर च वोटें दी गिनतरी च बड़ी मती गड़बड़ी कीती गई ऐ। दक्खन कोलकाता दे जिला चुनां अफसर हुंदे आसेया जारी इक ब्यान च आखेआ गया ऐ कि वोटें दी गिनतरी दी पूरी प्रक्रिया - पूरी चाली चुनां आयोग दे नियमें ते निर्देशें मुजब कराई गई ते एहदे च कुसै चाल्ली दी बी गड़बड़ी दी कोई शंका नैई ऐ। जिला चुनां अफसर हुंदी रिपोर्ट मुजब पूरी प्रक्रिया सुतंत्र- साफ सुथरें ते पारदर्शी ढंग्गै नै तोढ़ चाढ़ी गई ऐ ते इक-इक कारवाई कनूनी नियमें मताबक कीती गई ऐ। गिनतरी दौरान CCTV कैमरे बंद करने दे आरोपें गी बी उ'नें सिरे थमां खारज करी दिता ते आखेआ जे पूरी प्रक्रिया दौरान सारे CCTV कैमरे बरोबर कम्म करदे रहे।



Fake News

सरकार नै सोशल मीडिया पर वायरल उस वीडियो दा खंडन कीता ऐ जेदे चे दावा कीता गेआ ऐ जे भारतीय सेना कोलकाता च दाखिल होई ते जिसी नागरिकें रोकी दिता। पोस्ट च एह बी दावा कीता गेआ ऐ जे मुखमंत्रि ममता बैनर्जी घायल होई गेइयां। CRPF नै उन्दे आवास पर हमला कीता ते कोलकाता स्थित विदेशी दूतावासें गी बंद करने दा आदेश दिता। पत्र सूचना कार्यालय दी तथ्य जांच इकाई नै आखेआ जे एह दावा पूरी चाली बे-बुनियाद ऐ।



Cotton Produce

केन्द्रीय मंत्री मंडल नै भारत दे कपाह क्षेत्र च रुकावटें- घट्ट हुंदी वृद्धि ते गुणवत्ता सरबन्धी चिंताएं गी दूर करने आस्तै 5 जहार 6 सौ नाठ करोड़ रपे दे खर्च कन्नै कपाह उत्पादकता मिशन कपास कांती गी मंजूरी दिती ऐ। नमीं दिल्ली च इक संवाददाता सम्मेलन च सूचना ते प्रसारण मंत्री अश्वनी वैष्णव होरें आखेआ जे एह मिशन सरकार दे 5-F- विजन दे मूजब ऐ। एह कपा दी उत्पादकता बदाने पर केन्द्रीत ऐ। इस योजना कन्नै लगभग 32 लकख कपास करसानें गी लाह् थोने दी मेद ऐ। एदे कन्नै बरे 2030-31 तगर कपाह दा उत्पादन खरी मती मात्रा च बदाने दी मेद ऐ। केन्द्रीय मंत्रीमंडल नै आपात्तकालीन दौआर गारंटी योजना दे 5में गेइ गी बी मंजूरी देई दिती ऐ। इस योजना दे तैहत लौहके- भलेया लौहके ते दर्मयानें दर्जे दे उद्यमें गी 100 फीसद गारंटी प्रदान कीती जाहग- जिसले के गैर-सूक्ष्म, लघु ते मध्यम उद्यमें ते एयरलाइन क्षेत्र गी 90 फीसद गारंटी दिती जाहग।



NIA- Chargesheet

राष्ट्रीय जांच एजेंसी NIA नै ISIS कन्नै सरबन्ध होने ते जैविक हमले दे साजिश रचने दे चलदे त्रै लोकें खिलाफ आरोप-पत्र दाखल कीते न -जिंदे च इक डाक्टर बी शामिल ऐ। इन्हें आरोपिएं दे नां न - Dr. Syed Ahmad मोहयूद्दीन जेड़ा हैदराबाद दा रौहने आहला ऐ। होर आरोपी न- आजाद ते मोहम्मद सुहेल जेड़े उत्तर प्रदेश दे बसनीक न। राष्ट्रीय जांच एजेंसी नै एह आरोप-पत्र गुजरात च NIA दी अदालतें च दाखल कीते न।

<><><><><><>

SC-Judges Count

केन्द्री मंत्रीमंडल नै सुप्रीम कोर्ट च जजें दी गिनतरी बधाने सरबंधी प्रस्ताव गी मंजूरी देई दिती ऐ। इस सरबंधे च कल नमीं दिल्ली च इक प्रेस कांफ्रेंस गी सम्बोधित करदे होई सूचना ते प्रसारण मंत्री अश्विनी वैष्णव होरें दस्सेआ कि इस बिल च 1956 आहले- सुप्रीम कोर्ट दे जजें दी गिनतरी सरबंधी कनून च तरमीम करियै इस गिनतरी च 4 जजें दा बाददा करने दी पेशकश कीती गेदी ऐ। एल्लै सुप्रीम कोर्ट च जजें दी गिनतरी- प्रधान न्यायधीश गी छोड़ियै- 33 ऐ जिसी बधाइयै 37 करने दा प्रस्ताव ऐ।

<><><><><><>

MSP Sugai

काबिना नै बरे 2026-27 चीनी सीजन आस्तै गन्ने दा सेई ते लाहकारी मुल्य 365 रपे फीह क्विंटल तय किता ऐ। एह 10 इशारिया 2-5 फीसद दी मूल वसूली दर पर आधारित ऐ। सूचना ते प्रसारण मंत्री होरें दस्सेआ जे इस फैसले कन्नै लगभग 5 करोड़ गन्ना करसानें दे कन्नो-कन्नी चीनी मिलें च कम्म करने आहले लगभग 5 लक्ख मजदूरें गी लाह होग। केन्द्रीय कैबिनेट नै इंडिया सैमीकंडक्टर मिशन तैहत 2 होर सैमीकंडक्टर परियोजनाएं गी बी मंजूरी दिती ऐ। इंदे च गैलियम नाइट्राइज तकनीक पर आधारित मुख्य दी पैहली वाणिज्यिक मिनी माइको LED डिस्पले सुविधा ते इक सैमीकंडक्टर पैकेजिंग सुविधा शामिल ऐ।

<><><><><><>

Project Freedom

अमरीकी राष्ट्रपति डोनाल्ड ट्रम्प होरें प्रोजैक्ट “फ्रीडम” जेड़ा होर्मुज जल डमरु मध्य च फसे दे ज्हाजें गी सुरक्षित कड्डने आस्तै हा- गी फिलहाल रोकने दी घोषणा कीती ऐ। सोशल मीडिया दी इक पोस्ट च ट्रम्प होरें आखेआ जे हाल दी सैन्य गतिविधिं ते कूटनीतिक गल्ल च लगातार बेहतरी होने दे चलदे फिलहाल इसी किश चिर लेई रोकने दा फैसला कीता गेआ ऐ।

<><><><><><>

Govt. MSP

सरकार नै करसानें दे हिते च इक महत्वै आहले फैसले तैहत घट्टो-घट्ट समर्थन मुल्य तैहत 4 जहार 8 सौ करोड़ रपे रक्खे न। केन्द्रीय राई-बाई ते करसान कल्याण मंत्री शिवराज सिंह चौहान होरें घट्टो-घट्ट समर्थन मूल्य तैहत 9 जहार मैट्रिक टन सूरजमुखी दी खुशखरीद करने गी मंजूरी दिती ऐ। इस फैसले कन्नै सूरजमुखी फुल्लें दी काश्त कन्नै जुड़े दे करसानें गी लाह होग।

<><><><><><>

IPL

आई.पी.एल क्रिकेट च कल रातीं दिल्ली दे अरुण जेटली स्टेडियम च खेड्ढे गेदे मैच च चेन्नेई सुपर किंग्स नै दिल्ली कैपिटल्स गी 8 विकट कन्नै हराया। Sanju Samsen नै शानदार 87 रन्ज बनाए ते कार्तिक शर्मा नै 41 रन्ज दा योगदान दिता। 156 रन्ज दे लक्ष्य दा पिच्छा करदे होई चेन्नेई सुपर किंग्स नै 17 ओवर 3 गेंदें च 2 विकटां मुहाड़यै एह लक्ष्य हासिल करी लैता। संजू सैमसन गी प्लेयर ऑफ द मैच घोषित कीता गेआ। अज्ज संजा हैदराबाद दे राजीव गांधी अंतराष्ट्रीय स्टेडियम च सनराइजर्स हैदराबाद दा मुकाबला पंजाब किंग्स कन्नै होग।

<><><><><><>

Men's T-20I Ranking

अंतराष्ट्रीय क्रिकेट काउंसल ICC आसेया कल जारी सलाना रैंकिंग मुजब भारतीय मर्दे दी क्रिकेट टीम टी-20 अंतराष्ट्रीय रैंकिंग च पैहले नम्बरै पर बरोबर बनी दी ऐ। 275 रेटिंग अंके कन्नै भारत नै उप्परोतली दुई बारी ते कुल मलाड़यै त्रै बारी टी-20 विश्व कप जितियै अपनी अक्वल नम्बर दी सीट बरकरार रखी दी ऐ। 262 अंके कन्नै इंग्लैंड दुए ते 258 अंक हासिल करियै आस्ट्रेलिया त्रीएं नम्बरै पर ऐ। मार्च महीने टी-20 विश्व कप जितने कन्नै भारतीय टीम उप्परोतली एह कप अपने नां करने आहली दुनिया दी पैहली टीम बी बनी गई। बिलतरतीब 247 ते 244 अंके कन्नै न्यूजीलैंड ते दक्खन अफ्रीका चौथे ते पंजमें नम्बर पर ऐ। इक मूलांकन च मई 2025 कोला लेड़यै मार्च 2026 धोड़ी दे मैचें गी पूरे मुल्ल अंक कन्नै शामिल कीता गया ऐ जिसले कि एहदे शा पैहले मैचें दे मुल्ल अंके दा 50 प्रतिशत एहदे च जोड़या गया ऐ।

<><><><><><>